

Pemuda mengaku curi kereta dipenjara dua tahun

SIBU: Seorang pemuda yang mengaku bersalah mencuri sebuah kereta dijatuhi hukuman penjara dua tahun oleh Mahkamah Majistret di sini, semalam.

Jeffry Ngelai Tutong, 25, yang mengaku bersalah di hadapan Majistret Romario Jono, diperintah menjalani hukuman penjara berkuat kuasa dari tarikh sabit kesalahan semalam.

Dia didakwa mencuri sebuah kereta Kenari pada 31 Januari 2025, jam lebih kurang 12.15 tengah malam di belakang sebuah premis makan di Jalan Wong Ting Hock.

Sehubungan itu, tertuduh telah melakukan kesalahan yang boleh dihukum mengikut Seksyen 379A(1) Kanun Keseksaan, yang memperuntukkan hukuman penjara tidak kurang satu tahun serta tidak lebih tujuh tahun dan juga denda.

Fakta kes menyatakan pada 31 Januari 2025, jam 12.15 tengah malam, pengadu mendapati kereta Perodua Kenari miliknya hilang dipercayai telah dicuri.

Pengadu kemudian membuat laporan polis dan pada 4 April 2025, kira-kira jam 10.20 pagi, pihak polis telah menahan tertuduh di Kuching dan kira-kira jam 2.35 petang dengan dipandu arah oleh tertuduh, pihak polis telah menjumpai kereta yang dicuri di sebuah bengkel di Saratok.

Dalam kes berasingan di mahkamah sama, Jeffry turut dijatuhi hukuman penjara tiga bulan dan denda RM2,000 atas pertuduhan mencerooboh sebuah rumah di Sibu Jaya dengan niat

untuk mencuri.

Dia dituduh melakukan kesalahan itu pada 22 Januari 2025, jam lebih kurang 6 pagi di sebuah rumah di Townvilla, Sibu Jaya dan didakwa mengikut Seksyen 441 Kanun Keseksaan serta dihukum mengikut Seksyen 447 Kanun Keseksaan.

Seksyen 447 memperuntukkan hukuman penjara sehingga enam bulan atau denda hingga RM3,000 atau kedua-duanya sekali jika sabit kesalahan.

Berdasarkan fakta kes, pada hari kejadian pengadu terjaga dari tidur dan mendapati ruang tamu dalam keadaan berselerak.

Selepas diperiksa, pengadu mendapati beg tangan yang diletakkan di rak televisyen di ruang tamu telah hilang.

Pengadu kemudian memeriksa bahagian belakang rumah dan mendapati mangga pintu dan jeriji telah diumpil.

Antara barang yang hilang adalah seutas rantai leher emas, seutas gelang tangan emas, sebutuk cincin, sepasang anting-anting emas, kad pengenalan, kad bank, lesen memandu, tiga kad pengenalan anak pengadu, wang tunai RM1,900 serta tiga unit telefon bimbit, dengan kerugian dianggarkan sebanyak RM12,000.

Pengadu kemudian membuat laporan polis dan pada 9 April 2025, kira-kira jam 10 pagi tertuduh telah ditangkap di pekarangan Mahkamah Sibu.

Ketika disoal siasat, tertuduh mengaku masuk ke rumah pengadu seorang diri serta mencuri barang dari dalam rumah sementara dua lagi rakannya menunggu di dalam kereta.